

11 JANUARI 2018

Pengganggu mengamuk guna pedang samurai ditahan polis

KOSMO! KHAMIS 11 JANUARI 2018

NEGARA 3

Pengganggu mengamuk guna pedang samurai ditahan polis

Oleh TAUFIK SALIMIN

KUCHING - Seorang pengganggu yang mengamuk dan merosakkan rumah serta motosikal jirannya dengan menggunakan pedang samurai bulan lalu ditahan polis di kediamannya di Kampung Tabuan Foochow di sini kelmarin.

Ketua Polis Daerah Kuching, Asisten Komisioner Abang Ahmad Abang Julai berkata, suspek yang berusia 25 tahun tersebut diberkas pada pukul 9 pagi bersama sebilah pedang samurai yang digunakannya ketika mengamuk di rumah jirannya itu.

Menurutnya, dalam kejadian pada pukul 7.45 pagi, 3 Disember tahun lalu, pemuda terbabit telah mengamuk di rumah seorang penduduk

dengan membawa sebilah pedang samurai sebelum melibas senjata tajam itu ke arah mangsa sebanyak tiga kali.

"Mangsa bernasib baik apabila libasan pedang itu yang dilakukan suspek tidak mengenainya. Lelaki terbabit kemudiannya pulang semula ke rumah.

"Bagaimanapun, pada keesokan harinya, suspek yang masih tidak berpuas hati pergi semula ke rumah mangsa bersama tiga rakannya pada pukul 6.40 petang. Suspek telah memecahkan pintu dan tingkap rumah mangsa selain merosakkan motosikalnya," kata beliau ketika dihubungi semalam.

Abang Ahmad memberitahu, polis yang menerima maklumat mengenai kejadian itu daripada penduduk se-

tempat telah menjalankan siasatan lanjut dan akhirnya berjaya memberkas suspek.

Katanya, polis juga sedang mengesan tiga lagi rakan suspek yang berada bersamanya ketika kejadian bagi membantu siasatan.

"Sehingga kini suspek masih belum membuat sebarang pengakuan mengenai tindakannya terhadap mangsa.

"Polis sedang berusaha menyasiasat motif sebenar kejadian amuk itu memandangkan suspek kini ditahan reman sehingga esok (hari ini)," ujarnya.

Suspek yang positif dadah jenis syabu ketika diberkas kini direman bagi membantu siasatan mengikut Seksyen 506/427 Kanun Keseksaan kerana melakukan ugutan jenayah.



SUSPEK (dua dari kanan) yang mengamuk di rumah jirannya diberkas polis di Kampung Tabuan Foochow, Kuching kelmarin.